



SEMBAH ALU-ALUAN

**YANG BERHORMAT
PEHIN UDANA KHATIB DATO PADUKA SERI SETIA
USTAZ HAJI AWANG BADARUDDIN BIN PENGARAH
DATO PADUKA HAJI AWANG OTHMAN,
*MENTERI HAL EHWAL UGAMA***

**DI MAJLIS MUSABAQAH MEMBACA AL-QURAN
BAHAGIAN DEWASA PERINGKAT AKHIR KEBANGSAAN
TAHUN 1446HIJRAH / 2025 MASIHI**

**HARI SELASA (MALAM RABU),
24HB SYAWAL 1446H / 22HB APRIL 2025M
(MALAM PERTAMA)**

**BERTEMPAT,
DI PUSAT PERSIDANGAN ANTARABANGSA,
BERAKAS, NEGARA BRUNEI DARUSSALAM**

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، وَبِهِ نَسْتَعِينُ عَلَى أُمُورِ الدُّنْيَا وَالْآخِرَةِ، وَالصَّلَاةُ وَالسَّلَامُ عَلَى أَشْرَفِ الْأَنْبِيَاءِ وَالْمُرْسَلِينَ
سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.

السلام عليكم ورحمة الله وبركاته

Mengadap Kehadapan Majlis
Duli Yang Teramat Mulia
Paduka Seri Pengiran Muda Mahkota
Pengiran Muda Haji Al-Muhtadee Billah
Ibni Kebawah Duli Yang Maha Mulia
Paduka Seri Baginda Sultan
Haji Hassanah Bolkiah Mu'izzaddin Waddaulah,
Menteri Kanan di Jabatan Perdana Menteri.

Beribu Ampun,

AlhamduLillah wasysyukruLillah. Dengan izin dan rahmat-Nya, malam pertama Musabaqah Membaca Al-Qur'an Bahagian Dewasa Peringkat Kebangsaan tahun ini seperti juga pada tahun-tahun sebelumnya adalah diserikan oleh keberangkatan Duli Tuanku yang akan mengurniakan sabda perasmianya.

Maka dengan menjunjung ampun hamba Duli Tuanku dan juga mewakili Penasihat-Penasihat dan segenap peringkat Ahli-Ahli Jawatankuasa Tertinggi Hari-Hari Kebesaran Islam Peringkat Negara dan Musabaqah Membaca Al-Qur'an Bahagian Dewasa Peringkat Akhir Kebangsaan tahun 1446 Hijriah/2025 Masihi, dan juga rakan serta sahabat-sahabat yang tahun ini menempati giliran menjadi penganjur bersama acara majlis dengan Kementerian Hal Ehwal Ugama, iaitu dari Kementerian Hal Ehwal Luar Negeri dan Kementerian Kebudayaan Belia dan Sukan serta dari sektor swasta ialah Brunei Shell Marketing, dan seterusnya Ahli-Ahli Jawatankuasa Majlis yang dianjurkan ini, abis hamba Duli tuanku sekalian menyembahkan sembah junjung kasih yang tinggi di atas

perkenan Duli Tuanku berangkat ke majlis yang berhiaskan sulaman suci tilawah ayat-ayat Al-Qur'an.

Maka dengan mengambil sukut baik keberkatannya itu abis hamba Duli Tuanku mendo'akan semoga Duli Tuanku dan Kerabat Duli Tuanku akan sentiasa sihat dan bahagia dengan limphan rahmat kasih sayang Allah *Subhanahu wa Ta'ala* serta sentiasa dalam perlindungan-Nya.

Disembahkan bahawa Musabaqah kali ke-67 tahun diadakan ini adalah bertemakan ***Akal Sihat Dengan Al-Qur'an***, iaitu pada mendukung dan menyuntik kesedaran serta menjayakan usaha kita senegara dalam menangani gejala mental dengan pendekatan kerohanian disamping ilmu dan amalan praktikal aspek perubatan dan kesihatan.

Dalam masa yang sama tema ***Akal Sihat Dengan Al-Qur'an*** adalah juga berarti dengan mengamalkan gaya hidup sihat, yang dalam konteks Al-Quran ialah amalan membaca al-Qur'an yang antaranya akan mententeramkan jiwa, hati sanubari dari resah gelisah dan gundah gulana, iaitu sebagaimana maksud dari firman Allah Surah ar-Ra'd ayat 28:

الَّذِينَ ءَامَنُوا وَتَطْمَئِنُّ قُلُوبُهُمْ بِذِكْرِ اللَّهِ أَلَا بِذِكْرِ اللَّهِ تَطْمَئِنُّ الْقُلُوبُ ﴿٢٨﴾

Tafsirnya: *"Orang-orang yang beriman dan hati mereka menjadi tenteram dengan mengingat Allah. Ingatlah, hanya dengan mengingat Allah hati menjadi tenteram."*

Dan hadith Rasulullah *Shallallahu 'alaihi wasallam* yang diriwayatkan oleh Imam Muslim:

وَمَا اجْتَمَعَ قَوْمٌ فِي بَيْتٍ مِنْ بُيُوتِ اللَّهِ، يَتْلُونَ كِتَابَ اللَّهِ، وَيَتَذَكَّرُونَ فِيهِ، إِلَّا نَزَلَتْ عَلَيْهِمُ السَّكِينَةُ، وَعَشِيَّتْهُمْ الرَّحْمَةُ وَخَفَّتْهُمُ الْمَلَائِكَةُ، وَذَكَرَهُمُ اللَّهُ فِيمَنْ عِنْدَهُ

Mafhumnya: *Tiada duduk berkumpul suatu kaum di suatu rumah dari rumah-rumah Allah, mereka membaca kitab Allah dan*

bertadarus di antara mereka, melainkan turunlah kepada mereka ketenangan, diliputi mereka dengan rahmat, dilindungi oleh para malaikat dan Allah menyebut-nyebut mereka itu dikalangan orang yang ada di sisinya (para malaikat).

Dalam hubungan musabaqah ini dan musabaqah-musabaqah membaca Al-Qur'an yang berterusan diadakan adalah sebagai merangsang suasana ayat-ayat Al-Qur'an dibacakan hampir setiap waktu dan ketika. Namun dalam pada itu kita perlu juga menyedari bahawa ke arah yang dimaksudkan untuk berakal sihat dengan Al-Qur'an melalui amalan gaya hidup yang sihat itu adalah tersedia melalui dasar pendidikan nasional kita.

Sesungguhnya pendidikan formal yang meliputi pembelajaran ugama atau pengetahuan Islam (*Islamic Knowledge*), secara amali khasnya bersembahyang dan membaca Al-Qur'an di sekolah-sekolah itu, di samping ada yang mempelajarinya secara non formal atas inisiatif persendirian atau keluarga dengan mendatangkan guru mengaji mengajar ke rumah-rumah, dan menghantar anak – cucu ke masjid-masjid pada sebelah pagi hari Jumaat, kesemuanya itu adalah dilihat sebagai usaha negara dan orang ramai untuk memungkinkkan generasi demi generasi kita adalah generasi yang celik Al-Qur'an yang tentunya akan lebih baik dan sempurna lagi dengan berjinak-jinak untuk memahami ayat-ayat yang dibaca.

In syaa Allah semua itu akan membawa berkat iaitu berkat Al-Qur'an itu sendiri dan berkat membaca dan memahami kandungannya. Dengan itu adalah selaras dengan tujuan tema Musabaqah **Akal Sihat Dengan Al-Qur'an** melalui mengamalkan cara hidup sihat iaitu usaha sendiri dengan melazimkan membaca Al-Qur'an.

Ungkapan kata tema musabaqah **Akal Sihat Dengan Al-Qur'an** tidaklah semata-mata bermaksud untuk mengawasi dan mengetasi gejala mental akan semakin bertambah di kalangan kita lalu semakin ramai pesakitnya untuk dirawat secara kerohanian disamping secara ilmiah praktikal perubatan dan kesihatan. Sebaliknya kita menyediakan sarana untuk

mengelakkannya dengan kita sendiri dan generasi seterusnya terdidik bersekolah formal dalam dasar pendidikan nasional, aliran persekolahan umum dan persekolahan ugama/arab. Dengan itu kita dan generasi kita seterusnya mempunyai persediaan untuk mengamalkan cara atau gaya hidup sihat secara kerohanian dengan pandai membaca Al-Qur'an, apatah lagi dengan memahami ayat-ayatnya. Maka sekaligus dengan pandai membaca Al-Qur'an dan melazimkan diri untuk membacanya adalah dalam usaha menjaga dan memastikan kita akan berakal sihat dengan mengamalkan gaya hidup sihat secara kerohanian melalui Al-Qur'an yang dimiliki dan dibaca dengan lazim.

Semoga Allah Ta'ala mentaufeqkannya.

Beribu Ampun –

Demikianlah disembahkan. Hamba Duli Tuanku menjunjung ampun atas sebarang suruk langkah dan tutur kata yang tidak sengahaja.

Sebelum mengakhiri sembah mukadimah ini sekali lagi hamba Duli Tuanku menyembahkan sembah junjung kasih atas keberangkatan Duli Tuanku yang seterusnya akan menyemarakkan lagi Musabaqah Tilawah Al-Qur'an Bahagian Dewasa Peringkat Kebangsaan Tahun ini dengan sabda perasmian Duli Tuanku. Hamba Duli Tuanku juga menjunjung ampun atas silap salah dan suruk langkah yang janggal.

Seterusnya hamba Duli Tuanku menjunjung perkenan untuk menyembahkan sembah junjung kasih atas keberangkatan Paduka Adinda Duli Tuanku, Duli Yang Teramat Mulia Paduka Seri Pengiran Muda Abdul Malik dengan iringan doa semoga Paduka Adinda Duli Tuanku yang akan juga berangkat menyerikan musabaqah ini pada malam keduanya esok, in syaa Allah, akan sentiasa dalam 'inayah Allah *Subhanahu wa Ta'ala*, sehat dan bahagia bersama kerabat.

Paduka-Paduka Ayahnda Duli Tuanku;

- Duli Yang Teramat Mulia,
Paduka Seri Pengiran Perdana Wazir

Sahibul Himmah Wal-Waqar
Pengiran Muda Mohamed Bolkiah,

- Duli Yang Teramat Mulia,
Paduka Seri Pengiran Bendahara
Seri Maharaja Permaisua
Pengiran Muda Haji Sufri Bolkiah,
- Duli Yang Teramat Mulia,
Paduka Seri Pengiran Digadong Sahibul Mal
Pengiran Muda Haji Jefri Bolkiah,

Demikianlah seterusnya hamba Duli Tuanku dengan takzim juga menyembhkan sembah junjung kasih atas keberangkatan;

- Yang Amat Mulia, Pengiran-Pengiran Cheteria;

Dan ucapan terima kasih di atas kehadiran;

- Yang Berhormat, Penasihat Khas Kebawah Duli Yang Maha Mulia dan Menteri di Jabatan Perdana Menteri,
- Yang Berhormat, Yang Di-Pertua Majlis Mesyuarat Negara,
- Menteri-Menteri Kabinet,
- Ahli-Ahli Majlis-Majlis Mesyuarat,
- Tetamu-Tetamu Khas,
- Timbalan-Timbalan Menteri,
- Duta-Duta, Pesuruhjaya Tinggi dan Diplomat-Diplomat Negara-Negara Sahabat,
- Dhif-Dhif yang dihormati,
- Para hadirin-hadirat yang berbahagia sekalian.

Diucapkan terima kasih tanda penghargaan kepada sekalian peringkat jawatankuasa kerja, pihak-pihak yang menyumbang serta memberikan kerjasama dan pertolongan bagi menjayakan majlis musabaqah ini.

Semoga kita sekalian beroleh berkat dan mendapat ampun serta redha Allah dunia akhirat.

Sekian.

وبالله التوفيق والهداية
والسلام عليكم ورحمة الله وبركاته

Hamba Duli Tuanku Menjunjung Anugeraha.

- Pehin Udana Khatib Dato Paduka Seri Setia
Ustaz Haji Awang Badaruddin bin Pengarah
Dato Paduka Haji Awang Othman,
Menteri Hal Ehwal Ugama.

Daraina - 8 Spg 530 Sg Besar,
KM 13 Jln Kota Batu, BD 2517, Brunei.
Khamis, 18hb. Syawal 1446/17hb. April 2025.